

Trefniadau ar gyfer Comisiynu Gwasanaethau – Cyngor Bwrdeistref Sirol Caerffili

Blwyddyn archwilio: 2023-24

Dyddiad cyhoeddi: Ebrill 2025

Cyfeirnod y ddogfen: 4914A2025

Paratowyd y ddogfen hon fel rhan o waith a gyflawnir yn unol â swyddogaethau statudol.

Rydym yn croesawu gohebiaeth a galwadau ffôn yn Gymraeg a Saesneg. Ni fydd gohebu yn Gymraeg yn arwain at oedi.

Mae'r ddogfen hon hefyd ar gael yn Saesneg. This document is also available in English.

Cynnwys

Adroddiad cryno	
Pam y cynhaliom ni'r archwiliad hwn	4
Ein dyletswyddau archwilio	4
Ein hamcanion ar gyfer yr archwiliad hwn	4
Pam fod comisiynu'n bwysig	4
Yr hyn y gwnaethom fwrw golwg arno a sut y mae da'n edrych	5
Ein dulliau archwilio a phryd y cynhaliom ni'r archwiliad	5
Yr hyn a ganfuom	6
Ein hargymhellion i'r Cyngor	9
Atodiadau	
Atodiad 1 – cwestiynau a meini prawf archwilio	10

Adroddiad cryno

Pam y cynhaliom ni'r archwiliad hwn

Ein dyletswyddau archwilio

- 1 Rydym yn cynnal yr archwiliad hwn dan y dyletswyddau sydd wedi eu cynnwys yn:
 - adran 17 Deddf Archwilio Cyhoeddus (Cymru) 2004 (Deddf 2004) i helpu i alluogi'r Archwilydd Cyffredinol i fod wedi'i argyhoeddi (neu beidio) bod y Cyngor wedi sefydlu trefniadau priodol i sicrhau gwerth am arian o ran y modd y mae'n defnyddio ei adnoddau; ac
 - adran 15 Deddf Llesiant Cenedlaethau'r Dyfodol (Cymru) 2015 i helpu i alluogi'r Archwilydd Cyffredinol i asesu i ba raddau y mae'r Cyngor yn gweithredu yn unol â'r egwyddor datblygu cynaliadwy wrth gymryd camau i gyflawni ei amcanion llesiant.
- 2 Gall yr archwiliad hwn oleuo astudiaeth ar gyfer gwella gwerth am arian dan adran 41 Deddf 2004 hefyd.

Ein hamcanion ar gyfer yr archwiliad hwn

- 3 Ein hamcanion ar gyfer yr archwiliad hwn yw:
 - darparu sicrwydd bod gan gynghorau drefniadau priodol ar gyfer comisiynu gwasanaethau i sicrhau gwerth am arian o ran y modd y maent yn defnyddio adnoddau;
 - darparu sicrwydd bod cynghorau'n gweithredu yn unol â'r egwyddor datblygu cynaliadwy wrth gomisiynu gwasanaethau; ac
 - egluro sut y mae cynghorau'n mynd ati i gomisiynu gwasanaethau ac ysbrydoli a grymuso cynghorau a chyrrff eraill yn y sector cyhoeddus trwy adnabod a rhannu enghreifftiau o arfer/dulliau nodedig lle y bo'n berthnasol.
- 4 Rydym yn cynnal yr archwiliad hwn ym mhob un o'r 22 o brif gynghorau yng Nghymru.

Pam fod comisiynu'n bwysig

- 5 Comisiynu yw'r broses a ddefnyddir gan y Cyngor i ddylunio gwasanaethau y mae'n bwriadu eu darparu. Mae'n dechrau â diffinio'r gwasanaeth a'r allbynnau a deilliannau a dymunir ac yn diweddu pan fo'r Cyngor yn trefnu ei ddull darparu. Er enghraifft, trwy sefydlu tîm darparu yn fewnol, neu drwy gaffael cyflenwr allanol.
- 6 Gall trefniadau comisiynu helpu i sicrhau bod gwasanaethau'n cael eu darparu mewn modd darbodus, effeithlon ac effeithiol. I'r gwrthwyneb, gall gwendidau mewn trefniadau comisiynu leihau effaith gwasanaethau a'u gwerth am arian, hyd yn oed os yw'r prosesau sy'n dilyn, megis caffael a rheoli contractau, yn gadarn.



Yr hyn y gwnaethom fwrw golwg arno a sut y mae da'n edrych¹

- 7 Fe wnaethom adolygu trefniadau'r Cyngor ar gyfer comisiynu gwasanaethau ac yn benodol i ba raddau y mae hyn wedi cael ei ddatblygu yn unol â'r egwyddor datblygu cynaliadwy; ac y bydd yn helpu i sicrhau gwerth am arian o ran y modd y defnyddir adnoddau'r Cyngor.
- 8 Nid oedd yr archwiliad hwn yn cynnwys trefniadau caffael na threfniadau rheoli contractau'r Cyngor.
- 9 Roedd yr archwiliad yn ceisio ateb y cwestiwn cyffredinol hwn: **Wrth gomisiynu gwasanaethau, a yw'r Cyngor yn sefydlu trefniadau priodol i sicrhau gwerth am arian o ran y modd y mae'n defnyddio ei adnoddau?**
- 10 Fe ddefnyddiom ni'r meini prawf archwilio a nodir yn **Atodiad 1**, sydd hefyd yn dangos y berthynas rhwng y meini prawf a'r cwestiynau archwilio. Goleuwyd hyn gan ein gwybodaeth gronnu yn ogystal â'r hierarchaeth gwestiynau a dangosyddion cadarnhaol yr ydym wedi'u datblygu i ategu ein harchwiliadau o gymhwyso'r Egwyddor Datblygu Cynaliadwy.



Ein dulliau archwilio a phryd y cynhaliom ni'r archwiliad

- 11 Mae ein canfyddiadau'n seiliedig ar adolygiadau o ddogfennau, a chyfweliadau gyda'r uwch swyddog(ion) sy'n gyfrifol am ddatblygu dull comisiynu strategol y Cyngor. Fe wnaethom hefyd gyfweld ag uwch swyddogion â chyfrifoldeb am wasanaethau y mae'r Cyngor wedi'u comisiynu'n allanol.
- 12 O ystyried yr ystod eang o wasanaethau sydd gan y Cyngor, fe wnaethom brofi sampl o'r trefniadau y mae'r Cyngor wedi'u sefydlu i gomisiynu gwasanaethau. I wneud hyn, fe ddewisom ni nifer o wasanaethau lle mae'r Cyngor wedi penderfynu comisiynu gwasanaethau'n allanol ac fe archwiliom ni'r trefniadau comisiynu y mae'r Cyngor wedi'u rhoi ar waith. Y sampl o feysydd gwasanaeth y gwnaethom eu hadolygu yn y Cyngor oedd:
 - Cymorth Lle Bo'r Angen a Chapasiti Ariannol
 - Fframwaith Addysg Heblaw Yn Yr Ysgol (EOTAS)
 - Rhoi Tîm Caerffili Ar Waith (Adolygiad o'r Gwasanaethau Fflyd a Darparu Prydau Uniongyrchol yn y Dyfodol, a Chaffi Hive, Tŷ Penallta)

¹ Fe'i diffinnir fel 'yr hyn a ddylai fod' yn ôl deddfau neu reoliadau, 'yr hyn a ddisgwylir' yn ôl arfer gorau, neu 'yr hyn a allai fod', pe bai'r amodau'n well.

- 13 Mae'r dystiolaeth yr ydym wedi'i defnyddio i oleuo ein canfyddiadau'n gyfyngedig i'r ffynonellau hyn. Fe wnaethom y gwaith hwn rhwng mis Medi 2024 a mis Ionawr 2025.
- 14 Rydym yn gwneud y gwaith hwn ym mhob un o'r 22 o brif gynghorau yng Nghymru ac, yn ogystal ag adrodd yn lleol wrth bob cyngor, rydym hefyd yn bwriadu cynhyrchu adroddiad cenedlaethol.



Yr hyn a ganfuom

- 15 Ar y cyfan, canfuom fod gwendidau yn nhrefniadau comisiynu'r Cyngor a allai greu risg nad yw'n sicrhau gwerth am arian o ran y modd y defnyddir ei adnoddau. Rydym yn nodi isod pam y daethom i'r casgliad hwn.
- 16 Ar yr adeg y cwblhaom ni ein harchwiliad, roedd y Cyngor wrthi'n mireinio ei dull comisiynu. Er bod y dull newydd wedi'i fireinio'n dal i gael ei ddatblygu ar y pryd, gallai'r Cyngor ddarparu enghraifft o wasanaeth a oedd wedi defnyddio'r trefniadau comisiynu wedi'u mireinio. Fodd bynnag, gan nad oedd y trefniadau newydd wedi cael eu dogfennu'n llawn na'u cadarnhau gan y Cyngor ar ôl eu mireinio, mae ein canfyddiadau'n seiliedig i raddau helaeth ar drefniadau comisiynu cyfredol y Cyngor.
- 17 Mae'r Cyngor yn ei gwneud yn ofynnol i feysydd gwasanaeth nodi diffiniad ac esboniad clir o'r angen am wasanaethau a gomisiynir, ynghyd â'u deilliannau bwriadedig. Dangosodd y meysydd gwasanaeth a archwiliwyd gennym ni fod hyn yn ei le. Mae bod â dealltwriaeth eglur am y rhesymau pam fod gwasanaethau'n cael eu comisiynu a'r hyn y maent wedi'i fwriadu i'w gyflawni'n elfennau pwysig o drefniadau i sicrhau gwerth am arian.
- 18 Mae'r Cyngor yn ystyried ystod o opsiynau darparu cyn penderfynu comisiynu gwasanaeth. Er enghraifft, rhoddodd y Cyngor ystyriaeth i ystod o opsiynau ar gyfer darparu ei Wasanaeth Prydau Uniongyrchol cyn penderfynu rhoi'r gorau i'w ddarparu. Rhannodd yr opsiynau hyn gyda chynghorwyr ar gyfer craffu hefyd cyn gwneud penderfyniad. Mae'n bwysig bod ystod o wahanol opsiynau comisiynu'n cael eu hystyried i helpu i sicrhau y dewisir yr opsiwn sy'n darparu'r gwerth gorau am arian.
- 19 Nid yw'r Cyngor yn mynd ati'n rheolaidd i ystyried amrywiaeth eang o wybodaeth i oleuo ei ddewis o opsiynau comisiynu. Mae Asesiad Effaith Integredig (IIA) y Cyngor yn ei gwneud yn ofynnol i feysydd gwasanaeth restru'r wybodaeth a ddefnyddiwyd i oleuo datblygiad cynigion comisiynu. Mae Cod Ymarfer Caffael y Cyngor yn pwysleisio pwysigrwydd "ymchwil cyn caffael" hefyd. Fodd bynnag, canfuom nad oedd hyn wedi'i nodi yn y sampl o wasanaethau a adolygwyd gennym ni. Trwy beidio â defnyddio amrywiaeth lawn o wybodaeth o ffynonellau mewnol ac allanol i oleuo penderfyniadau comisiynu, ceir risg bod y Cyngor yn datblygu gwasanaethau nad ydynt o bosibl yn darparu gwerth am arian nac yn diwallu anghenion defnyddwyr gwasanaethau.

- 20 Nid yw'r cyngor yn ystyried yn gyson beth mae hirdymor yn ei olygu wrth gynllunio ei ddull o gomisiynu gwasanaethau na sut y bydd yn taro cydbwysedd rhwng anghenion tymor hwy a byrdymor. Nid yw'r Cyngor yn ei gwneud yn ofynnol i feysydd gwasanaeth ystyried beth mae hirdymor yn ei olygu mewn perthynas â phenderfyniadau comisiynu, ac fe ganfu ein hadolygiad o sampl o feysydd gwasanaeth nad yw hyn wastad yn cael ei ystyried yn glir. Fodd bynnag, canfuom rai enghreifftiau o ystyriaethau cynllunio tymor hwy a sut y byddid yn taro cydbwysedd rhwng y rhain ac anghenion byrdymor. Er enghraifft, mae'r Cyngor yn darparu rhai gwasanaethau tai gan ddefnyddio gwahanol fathau o gontractau i ymateb i amrywiadau yn y galw dros y tymor byr a hir.
- 21 Hefyd, nid yw'r Cyngor yn sicrhau'n gyson ei fod yn deall y goblygiadau hirdymor o ran adnoddau wrth gomisiynu gwasanaethau. Mae ffurflen Proses Mentrau Newydd y Cyngor yn gofyn i feysydd gwasanaeth beth fydd costau disgwylidied cyflawni'r newid arfaethedig. Mae gan wasanaethau cymorth sy'n gysylltiedig â thai eu ffurflen Dadansoddiad Ariannol eu hunain hefyd i asesu costau. Fodd bynnag, nid oedd y ffurflenni hyn wedi cael eu cwblhau ar gyfer y gwasanaethau a adolygwyd gennym ni. Trwy beidio â deall goblygiadau penderfyniadau comisiynu yn y tymor byr a hwy, mae'r Cyngor yn cynyddu'r risg o beidio â chyflawni gwerth am arian dros y tymor hwy.
- 22 Nid yw'r Cyngor yn nodi fel rhan o'r drefn arferol sut y bydd yn monitro ac yn asesu gwerth am arian gwasanaethau a gomisiynir. Mae Cod Ymarfer Caffael y Cyngor yn nodi y dylai gwerth am arian gael ei fonitro trwy'r drefn ar gyfer rheoli contractau o ddydd i ddydd. Fodd bynnag, nid oedd yr holl feysydd gwasanaeth a archwiliwyd gennym ni wedi nodi sut y byddent yn asesu ac yn monitro gwerth am arian. Trwy beidio â sicrhau'n gyson bod meysydd gwasanaeth yn nodi sut y bydd gwerth am arian yn cael ei asesu a'i fonitro, mae'n anodd i'r Cyngor ei sicrhau ei hun ei fod yn sicrhau gwerth am arian.
- 23 Nid yw'r Cyngor yn ystyried yn gyson sut y gall gwasanaethau a gomisiynir gynyddu i'r eithaf eu cyfraniad at ei amcanion llesiant ef ei hun neu amcanion llesiant cyrff eraill yn y sector cyhoeddus. Nid yw meysydd gwasanaeth y Cyngor wastad yn cydymffurfio â'r gofyniad corfforaethol i ystyried yr effeithiau ehangach y gall gwasanaethau eu cyflawni. Er enghraifft, mae Asesiad Effaith Integredig y Cyngor yn ei gwneud yn ofynnol i feysydd gwasanaeth ystyried sut y bydd gwasanaethau a gomisiynir yn effeithio ar ei amcanion llesiant ef ei hun a'r nodau Llesiant Cenedlaethol. Ond canfuom nad yw meysydd gwasanaeth yn cwblhau'r adran hon o'r Asesiad Effaith Integredig yn gyson. Hefyd, nid yw'r Asesiad Effaith Integredig yn ei gwneud yn ofynnol i feysydd gwasanaeth ystyried cysylltiadau ag amcanion llesiant cyrff eraill yn y sector cyhoeddus. Gall ystyried goblygiadau ehangach penderfyniadau comisiynu helpu'r Cyngor i osgoi dyblygu ac adnabod cyfleoedd ar gyfer manteision lluosog, ac felly sicrhau gwerth am arian.
- 24 Nid yw'r Cyngor yn deall yn gyson ar bwy y bydd y gwasanaethau a gomisiynir yn effeithio'n uniongyrchol ac yn anuniongyrchol. Er enghraifft, nid oedd yr un o'r gwasanaethau a adolygwyd gennym ni wedi cynnal dadansoddiad ffurfiol nac wedi'i ddogfennu o randdeiliaid neu ymarfer tebyg. O ganlyniad, nid yw'r Cyngor yn

mynd ati fel rhan o'r drefn arferol i ddefnyddio canlyniadau gweithgarwch cynnwys i oleuo sut y bydd yn comisiynu gwasanaethau. Mae Asesiad Effaith Integredig y Cyngor yn ei gwneud yn ofynnol i feysydd gwasanaeth ystyried sut i gynnwys pobl sydd â buddiant yn y gwasanaeth a sicrhau eu bod yn cynrychioli amrywiaeth ei gymunedau. Er enghraifft, fe ymgynghorodd y Cyngor â rhanddeiliaid ynghylch newidiadau arfaethedig i'w wasanaeth Prydau Uniongyrchol. Fodd bynnag, nid yw'n glir sut y gwnaeth yr ymgysylltu hwn oleuo'r broses gomisiynu. Mae cynnwys y rhai yr effeithir arnynt gan wasanaethau a gomisiynir wrth eu dylunio'n gallu helpu'r Cyngor i sicrhau bod gwasanaethau'n diwallu anghenion ei gymunedau, ac mae felly'n helpu i sicrhau gwerth am arian.

25 Nid yw'r Cyngor wastad yn ystyried pa bartneriaid presennol a phartneriaid posibl y gallai weithio gyda hwy i gomisiynu gwasanaethau er mwyn gwella gwerth am arian. Mae Asesiad Effaith Integredig y Cyngor yn gofyn i feysydd gwasanaeth ystyried sut y gallai'r Cyngor weithio gyda phartneriaid posibl wrth ffurfio'r cynnig comisiynu. Fodd bynnag, ni wnaed hyn gan y meysydd gwasanaeth a adolygwyd gennym ni. Serch hynny, canfuom enghraifft o wasanaeth a gomisiynwyd ar y cyd yng ngwasanaeth tai'r Cyngor. Gall mynd ati'n gyson i ystyried yr holl gyfleoedd posibl ar gyfer gweithio mewn partneriaeth helpu'r Cyngor i adnabod cyfleoedd i sicrhau gwerth am arian.

26 Nid yw'r Cyngor yn gwerthuso effeithiolrwydd a gwerth am arian ei ddull comisiynu. Hefyd, nid yw'r Cyngor yn mynd ati fel rhan o'r drefn arferol i rannu unrhyw wersi a ddysgwyd i oleuo ymarferion comisiynu ar draws holl feysydd y Cyngor yn y dyfodol. Mae rhannu gwersi a ddysgwyd yn bwysig oherwydd, er bod rhai gwasanaethau'n gwneud llawer o gomisiynu allanol, mae gan feysydd eraill yn y Cyngor lai o brofiad o gomisiynu allanol. Mae gwerthuso effeithiolrwydd gweithgarwch comisiynu hefyd yn bwysig i helpu i adnabod meysydd ar gyfer gwella a rhannu gwersi a all helpu'r Cyngor i sicrhau gwerth am arian.

Ein hargymhellion i'r Cyngor

Arddangosyn 1: ein hargymhellion i'r Cyngor

Argymhellion

A1 **Sefydlu trefniadau comisiynu cyson**

Er mwyn galluogi'r Cyngor i'w sicrhau ei hun bod ei benderfyniadau ar gyfer comisiynu gwasanaethau'n cael eu siapio'n gyson gan y canlynol:

- cynllunio dros raddfa amser briodol a tharo cydbwysedd rhwng anghenion tymor byr a hwy (Paragraff 20);
- dealltwriaeth am y goblygiadau hirdymor o ran adnoddau (Paragraff 21);
- nodi sut y bydd yn asesu ac yn monitro gwerth am arian (Paragraff 22);
- sicrhau bod effeithiau ehangach gwasanaethau a gomisiynir yn cael eu cynyddu i'r eithaf (Paragraff 23);
- gweithio gyda'r bobl a'r partneriaid iawn i ddylunio a darparu'r gwasanaeth (Paragraff 25); a
- rhannu gwersi ar draws y sefydliad (Paragraff 26).

A2 **Sicrhau y cydymffurfir â'i drefniadau comisiynu**

Er mwyn sicrhau bod dull comisiynu corfforaethol y Cyngor yn cael ei roi ar waith, dylai'r Cyngor gyflwyno trefniadau i fonitro'r modd y cydymffurfir ag ef. (Paragraffau 19 i 25)

A3 **Cyflwyno adolygiad rheolaidd o drefniadau comisiynu'r Cyngor**

Er mwyn sicrhau bod y Cyngor yn adnabod cyfleoedd i wella gwerth am arian, dylai fynd ati'n rheolaidd i werthuso effeithiolrwydd ei drefniadau comisiynu corfforaethol. (Paragraff 26)

Atodiad 1

Cwestiynau a meini prawf archwilio

Cwestiwn cyffredinol: Wrth gomisiynu gwasanaethau a yw'r Cyngor yn sefydlu trefniadau priodol i sicrhau gwerth am arian o ran y modd y mae'n defnyddio ei adnoddau?

Cwestiynau Lefel 2	Cwestiynau Lefel 3	Meini Prawf
A oes gan y Cyngor resymeg eglur dros gomisiynu gwasanaethau?	A yw'r Cyngor yn diffinio'n glir pa wasanaethau y mae'n bwriadu eu comisiynu a pham?	<ul style="list-style-type: none">• Mae'r Cyngor yn nodi diffiniad clir o'r gwasanaethau y mae'n bwriadu eu comisiynu• Mae'r Cyngor yn nodi 'pam' fod arno angen comisiynu'r gwasanaethau gan gynnwys:<ul style="list-style-type: none">– effaith/deilliannau bwriadedig darparu'r gwasanaeth– a fydd/sut y bydd y gwasanaeth yn helpu'r Cyngor i gyflawni ei ddyletswyddau statudol
	A yw'r Cyngor yn cynnal arfarniad cynhwysfawr o'r opsiynau comisiynu cyn penderfynu comisiynu gwasanaeth?	<ul style="list-style-type: none">• Mae'r Cyngor yn ystyried yr ystod lawn o opsiynau comisiynu ar gyfer darparu'r gwasanaeth – gallai'r opsiynau gynnwys y canlynol, er enghraifft:<ul style="list-style-type: none">– darpariaeth fewnol– trefniadau partneriaeth neu ddulliau o gomisiynu o fewn ac ar draws sectorau– allanoli'r gwasanaeth i ddarparwr arall trwy ymddiriedolaeth neu drefniant arall– contractio'r gwasanaeth trwy broses dendro• Mae'r Cyngor yn ystyried costau a manteision yr opsiynau o safbwynt darbodaeth, effeithlonrwydd ac effeithiolrwydd – gan gynnwys dros y tymor byr, canolig a hir• Mae'r Cyngor yn cynnwys costau rheoli contract o fewn ei asesiad o opsiynau comisiynu• Mae'r Cyngor yn cynnwys asesiad o risg ar gyfer pob opsiwn comisiynu fel rhan o asesu costau a manteision• Mae'r Cyngor yn defnyddio amrywiaeth eang o wybodaeth o ffynonellau mewnol ac allanol i ddatblygu dealltwriaeth am y ffactorau cyffredol a hirdymor sy'n

		debygol o effeithio ar wasanaethau a gomisiynir
A yw'r Cyngor yn cynllunio dros raddfa amser briodol?	A yw'r Cyngor yn ystyried beth mae hirdymor yn ei olygu wrth gomisiynu gwasanaethau?	<ul style="list-style-type: none"> • Mae'r Cyngor yn ystyried beth mae hirdymor yn ei olygu wrth gynllunio ei ddull o gomisiynu gwasanaethau – h.y. pa mor bell ymlaen all/ddylai gynllunio a pham • Mae'r Cyngor yn ystyried sut y bydd yn taro cydbwysedd rhwng anghenion byrdymor a hirdymor wrth gynllunio ar gyfer comisiynu gwasanaethau gan gynnwys, er enghraifft, wrth bennu'r ffrâm amser ar gyfer contractau neu drefniadau comisiynu eraill
	A yw'r Cyngor yn deall y goblygiadau hirdymor o ran adnoddau wrth gomisiynu gwasanaethau?	<ul style="list-style-type: none"> • Mae'r Cyngor yn meddwl am yr adnoddau y bydd eu hangen arno dros y tymor canolig a hwy (costau oes gyfan) i ddarparu gwasanaethau a gomisiynir • Mae'r Cyngor yn ystyried sut y gellid gweithredu ystod o senarios lleihau cyllideb yn y dyfodol mewn perthynas â gwasanaethau a gomisiynir
	A yw'r Cyngor yn nodi sut y bydd yn monitro gwerth am arian gwasanaethau a gomisiynir dros y tymor byr, canolig a hir?	<ul style="list-style-type: none"> • Mae'r Cyngor yn nodi'r trefniadau monitro y bydd yn eu dilyn ar gyfer y gwasanaeth a gomisiynir • Dylai'r Cyngor ddisgrifio sut y bydd gwerth am arian gwasanaethau a gomisiynir yn cael ei asesu a'i fonitro gan gynnwys: <ul style="list-style-type: none"> – costau a manteision – cynnydd tuag at gerrig milltir a mesurau tymor byr, canolig a hwy
A yw'r Cyngor wedi meddwl am yr effeithiau ehangach y gallai ei wasanaeth a gomisiynir eu cael?	Wrth gomisiynu gwasanaethau, a yw'r Cyngor yn ystyried sut y gall gynyddu eu cyfraniad at amcanion llesiant y Cyngor i'r eithaf?	<ul style="list-style-type: none"> • Mae'r Cyngor yn ystyried sut y bydd gwasanaethau a gomisiynir yn effeithio ar ei holl amcanion llesiant ei hun i sicrhau manteision lluosog, osgoi dyblygu neu unrhyw ganlyniadau anfwriadol, e.e. ystyried amcanion tymor hwy, y gadwyn gyflenwi leol, cydnerthedd y farchnad ac effaith hyd contractau, bioamrywiaeth, a lleihau carbon
	Wrth gomisiynu gwasanaethau, a yw'r Cyngor yn ystyried sut y gall gwasanaethau gynyddu eu cyfraniad at amcanion llesiant cyrff eraill yn y sector cyhoeddus i'r eithaf?	<ul style="list-style-type: none"> • Mae'r Cyngor yn ystyried sut y bydd gwasanaethau a gomisiynir yn effeithio ar amcanion llesiant cyrff eraill yn y sector cyhoeddus i sicrhau manteision lluosog ac osgoi dyblygu neu unrhyw ganlyniadau anfwriadol

	Wrth gomisiynu gwasanaethau, a yw'r Cyngor yn ystyried sut y gall gwasanaethau gynyddu eu cyfraniad at y Nodau Llesiant Cenedlaethol i'r eithaf?	<ul style="list-style-type: none"> Mae'r Cyngor yn ystyried sut y bydd gwasanaethau a gomisiynir yn effeithio ar y nodau llesiant cenedlaethol i sicrhau manteision lluosog ac osgoi dyblygu neu unrhyw ganlyniadau anfwriadol
A yw'r Cyngor yn gweithio gyda'r bobl a'r partneriaid iawn i ddylunio a darparu ei wasanaethau a gomisiynir?	A yw'r Cyngor wedi adnabod pwy y mae angen iddo eu cynnwys?	<ul style="list-style-type: none"> Mae'r Cyngor yn deall pwy fydd gwasanaethau a gomisiynir yn effeithio'n uniongyrchol ac yn anuniongyrchol arnynt. Goleuwyd hyn gan ddadansoddiad rhanddeiliaid neu ymarfer tebyg.
	A yw'r Cyngor yn cynnwys yr amrywiaeth lawn o bobl?	<ul style="list-style-type: none"> Mae'r Cyngor yn cynnwys yr amrywiaeth lawn o safbwyntiau wrth benderfynu sut i gomisiynu gwasanaethau. Mae'r Cyngor yn defnyddio canlyniadau gweithgarwch cynnwys i oleuo sut y bydd yn comisiynu gwasanaethau, gan gynnwys ei effaith ar grwpiau sy'n rhannu nodweddion gwarchoddedig
	A yw'r Cyngor yn cydweithio gyda'r partneriaid cywir?	<ul style="list-style-type: none"> Mae'r Cyngor yn deall yn dda pa bartneriaid a pha bartneriaid posibl y gallai weithio gyda hwy i gomisiynu gwasanaethau i wella gwerth am arian. Goleuwyd hyn gan ddadansoddiad cynhwysfawr o bartneriaid posibl a'u blaenoriaethau Lle mae cyfleoedd i wella gwerth am arian trwy gomisiynu gwasanaethau mewn partneriaeth yn cael eu hadnabod, mae'r Cyngor yn mynd ar eu trywydd
A oes gan y Cyngor drefniadau i werthuso gwerth am arian ei ddull comisiynu?	A yw'r Cyngor yn mynd ati fel rhan o'r drefn arferol i werthuso effeithiolrwydd ei drefniadau comisiynu?	<ul style="list-style-type: none"> Mae'r Cyngor yn adolygu effeithiolrwydd ei ddull comisiynu'n rheolaidd gan gynnwys: <ul style="list-style-type: none"> i ba raddau y mae gwasanaethau a gomisiynir yn cyflawni'r amcanion y mae'r Cyngor wedi'u pennu gwerth am arian modelau comisiynu a ddewiswyd gan gynnwys ystyried mewnbynnau, allbynnau a deilliannau
	A yw'r Cyngor yn mynd ati fel rhan o'r drefn arferol i rannu unrhyw wersi a ddysgwyd i oleuo ymarferion comisiynu yn y dyfodol?	<ul style="list-style-type: none"> Mae'r Cyngor yn rhannu ac yn cymhwyso unrhyw wersi a ddysgwyd o'i ddull comisiynu yn eang ar draws y sefydliad, a chyda phartneriaid lle y bo'n berthnasol.



Archwilio Cymru

1 Cwr y Ddinas

Caerdydd CF10 4BZ

Ffôn: 029 2032 0500

Ffacs: 029 2032 0600

Ffôn testun: 029 2032 0660

E-bost: post@archwilio.cymru

Gwefan: www.archwilio.cymru

We welcome correspondence and telephone calls in Welsh and English.
Rydym yn croesawu gohebiaeth a galwadau ffôn yn Gymraeg a Saesneg.